

贛州府志卷十二

建置志 官廡 雜建置附

府官廡

提督贛院在府城南明宏治八年乙卯都御史金澤創建
正德十三年戊寅都御史王守仁拓而廣之堂前爲露
臺賓館門屏坊額後堂曰抑抑曰燕居軒曰思歸曰仕
學樓曰宜南亭曰無逸曰君子曰觀德闢其左爲射圃
尚書何喬新記嘉靖間都御史汪鉉建提督都察院題
名碑自爲記

何記云皇上即位之七年汀贛姦氓合爲寇其始甚微
萑苻狗鼠之盜耳郡縣有司無遠略不急捕其勢寢熾

贛州府志

卷十二

府官廡

一

而嶺南湖湘之不逞者從而和之四出剽掠劫富室燔
民居掠帑藏殺官軍闕然爲東南郡縣患有司始駭而
圖之脩其東則發於西剽其南則竄於北時鎮守江西
太監鄧原暨巡按監察御史都布按三司議以爲盜之
未平以政令不一而鄰境有司不肯協心故也宜設巡
撫憲臣置司要地以節制之而割附近郡縣以隸之則
盜易平迺具奏其事皇帝俞其請爰命大臣慎選方岳
重臣有牧民御衆之才者以授之得廣東左布政使金
公澤遂遷都察院右副都御史俾巡撫江西兼督閩廣
湖湘之地置司於贛江西之南安贛州福建之汀州廣
東之潮州惠州南雄湖廣之郴州隸焉四省三司皆聽

節制賜之璽書許以便宜行事公至贛舊無巡撫治所於是鎮守巡按三司諸公謂公奉勅巡撫一方兼督四省事理至重不可無建牙駐節之所迺請於朝鈞校府庫羨財市材僦匠命副使談君俊叅議李君魁即贛城中擇地而營之前後堂各五間穿堂兩廂大門儀門廊廡各若干間堂左建後樂堂東則建賞功所大門之外立撫按鎮靜二坊牌屏墻之南又立三司廳以爲巡守兵備會議白事之所經始於宏治八年十月落成於明年閏三月穹堂峻宇高閎崇墉規制壯麗他鎮所未見也凡公政令之布賞罰之施皆在此諸帥出兵受律獻馘亦在此郡縣百司政有張弛亦必至此白之然後敢

罷行焉而贛遂爲重鎮公既蒞政盜遁姦革兵民以安既而巡按湖廣監察御史曾君昂建議謂韶州地險民獷且於潮惠鄰近宜以隸公朝議皆以爲然遂以韶州屬公所轄公以贛有巡撫院實自今始以書屬喬新記之竊謂自昔帝王疆理宇內固貴乎任用得其人然亦必政令出於一昔漢有西羌之警命趙充國出鎮雖強悍如辛武賢者不得撓其策宋有西蜀之變命張詠出守雖驕貴如王繼恩者不敢拂其言此二公所以能成功也夫以數郡之地分隸四省政令不一心力不齊安能成功乎聖天子納用群策舉而付於公自東徂西延袤數千餘里皆受節制廟謨宏且遠矣今公祇奉綸音

以節鉞鎮茲要地朝下一檄而諸藩奔走恐後夕馳一使而列闔罔敢差池異時群盜屏息四境晏然豐功偉烈銘彝卣而垂竹帛豈直追蹤張趙二公已哉公字德潤由名進士敷歷中外所至有賢聲所謂有牧民御衆之才者公真其人也 汪題名記云江廣閩荆四省相接之地凡八府一州山勢連絡民易聚而爲盜肇自宏治甲寅置巡撫都御史提督軍務總治之即贛城創都察院以居焉迄今凡三十有五載相繼蒞任凡十有一人未有題名鉉懼夫久之無考也乃命工鑿石題名於其上冀永傳焉夫人臣以盡職爲貴都御史奉天子簡命提兵一方責至重矣使兵威振盛盜懾伏不敢出斯

爲盡職矣乎曰未也然則空巢掃穴草薶而禽獮之斯爲盡職矣乎曰未也必也使生民安其業相生相養率自耻於爲盜焉斯爲盡職云爾然此豈易能哉守令者民之師帥守令帥民以仁而民不暴帥民以廉而民不貪則民之安其業耻於爲盜實於守令使之耳在昔龔黃卓魯治績之著載之史傳可考也然守令安得其責若是哉上者下之所視效故曰上有好者下必有甚焉者矣守令之上爲監司監司之上爲都御史都御史身也監司臂也守令指也身使臂臂使指轉移變化之機固在此而不在彼焉昔君陳監殷成王命之曰爾克敬典在德時乃罔不變君牙爲大司徒穆王命之曰爾

克正罔敢弗正民心罔中惟爾之中自古統御之官先自治而後治人大抵然也然爲都御史之盡職其大要有不在是乎是故敦吾仁飭吾廉無依勢作威無倚法以削喜怒予奪一秉至公而無私俾監司以是道帥守令守令以是道帥吾民則庶幾其可爾乃若專事於兵如前二者之云謂之曰盡職則未矣雖然謙六五不富以其鄰利用侵伐无不利象曰利用侵伐征不服也然則誅暴築亂曷嘗不用兵哉是故撫民以德謂之仁不服而征謂之義仁以生之義以成之一陽敷陰翕自然不易之理耳方今聖天子在上汲汲然以安民爲念擇任賢良宣布總威神武不殺蓋與堯之帝德廣運聖神

文武異世同符嗚呼有君如此其忍負之鉉之涼德深懼盡職之難也遂書此以自規

國朝初年兵火止存肅清六道節制四藩提督軍務三坊大門儀門餘俱灰燼順治四年丁亥巡撫劉武元仍舊制復修以故倉圍入射圃巡撫宜永貴擴轅門東民居爲馬道院北有王文成公祠康熙四年乙巳贛撫缺裁贛南道請於督撫遷道署於此十四年乙卯閩粵梗化江西巡撫移駐於此事平還省二十三年甲子副使□焯仍請之相沿至今遂爲道署

按院前舊有古栢數十株高可百尺常有群鶴翔集其上及缺裁栢漸枯而鶴亦去今尚存古栢數株

贛南道舊署即分巡嶺北道治在分守道西明成化二十三年丁未僉事李轍從鬱孤臺移建於此副使楊璋王度邵諫前後拓之嘉靖十八年己亥副使俞夔建有嶺北道題名碑董天錫記

記云國家稽古建官各守其職而不得相侵常制也常制之外復審時勢權宜則許兼職以便行事若今之兵備得兼分巡是已兵非邊境要害不設備近以腹內弗靖亦設焉時使然也西江一省分五道其隸嶺北者惟南贛二府接壤閩廣郴桂多荒山長谷窮民嘯聚爲盜時或有之臬司每歲巡歷糾察奸弊斷理刑獄而未有兵權倉卒遇患難於調度咸化丁未廷議設專官禁禦

而督以都憲大臣上俞其請四境賴以無虞而分巡則仍歲厯憲使宏治壬子始以兵備兼分巡事歸一而勢易行上下相安蓋無遺法顧兵憲交代不常而公署未有題名誠爲缺典嘉靖己亥春文峰俞公以憲副蒞贛乃請於前中丞玉泉王公今中丞訥菴吳公搜集前任名氏自李公轍始至公凡二十人列名樹碑於廳事之左使前有傳而後可續公之用心厚矣哉君子負經濟之才而見於用世必廉慎公勤始克有濟然善取諸人疾省諸內又修治之所當知者前此諸公之政豈無有盡善在所當法者乎亦豈無有未善在所當戒者乎一覽之餘而取舍兩得是碑之立似亦有益於公而非徒

爲文具矣公舉正德己丑進士兩任有司三轉風憲皆
綽著聲稱屢膺薦剡所謂廉慎公勤皆其素有施之於
政無徃不宜名位所就豈止於此而已哉庸記以俟
國初張鳳儀復加修葺康熙十年辛亥改巡道爲贛南道
十五年丙辰史燧建廉威堂王紫綬額曰虛白周體觀
又書正直忠厚四字康熙二十三年甲子丁燦移署贛
院知府任進爵改爲府治今仍之

吉贛南寧兵備道署即舊贛院署副使丁煒闢其左爲甃
園自爲記又請江都吳綺賦之

丁煒甃園記云使院東有地方二畝許外垣半圯辛酉
秋余始自西署移至周行間草沒屐棘牽袂雨徑泥滑

幾不容武屋踞其中椳桷僅具甘蕉十數本汗漫闌生
副坼階圯屋後老柚二株交柯輪困時方垂實纍纍爲
饑饉陰蝠所剥觸荒翳彌甚余慨然曰是非前人燕息
地乎何曠廢至此越壬戌政稍暇乃庀材鳩工謀結構
焉先葺其垣之圯者拓其地之狹者正其勢之偏者碱
其徑之窪者淖者因屋爲軒軒之雷注繕之椽敗易之
牖與壁黝且漉丹之望之而已軒前爲庭庭有架葡萄
蔓之夏期其陰也庭左右爲修垣爲老壁移前後亂蕉
列之陰愈茂矣其左右隙地宜花植以玉蝶古梅及千
葉緋桃狀如虬螭對攬而唐棣山茶木樨與垂絲海棠
紫薇諸名卉亦稍分植其旁增旖旎焉其左隙地視右

□□□□□籬覆以酴醾素馨庭始嶄嶄然中矣當中
庭負牆而立者其花爲海棠鐵榦霜枝槎枒盤鬱森與
桃梅鼎峙不待三春爛熳而古態可挹其平分海棠而
鵲侍者花則爲玉樹爲石竹桃爲磬口臘梅雖開落異
候而香色亦各具勝也牆陰餘地植木芙蓉數株繞諸
奔後作屏障羅列自是而中庭之花事始備闌軒北戶
爲後小院繚以疏垣玲瓏可望後圃使花氣時時出入
院植玉蘭丹桂於臺適與軒房後牖分映牆陰石欒安
素甕盆景十餘種以供開軒寓目翫院而東則疏垣之
外老柚在列蔭雙隅不畸不逼度其方中之位可亭遂
亭之交窻四闌昕夕不扃昭其曠也亭前繞以迴欄後

蔭修竹百數十竿其環亭而植者冬有紅白之梅春有
桃與李若梨亦足爲憑欄之御亭下庭可受月則錦石
墁焉紆其徑以通看竹每當素練澄輝方庭如水園中
新植梧桐玉蘭辛夷海棠諸樹與堦前蘭蕙共作龜魚
藻影搖曳空明恍疑濯魄冰壺也亭東構屋三間充兒
曹咕嗶而茶竈藥牀傍焉籬竹爲垣使花而藤者若長
春若黃棣棠之屬廁之而籬內之月桂木槿亦時送艷
引曳屣步則於亭之小景不無助焉虛亭西爲圃而凡
果之屬若棗若杏若櫻桃若海榴若粵橘花之屬若繡
毬若梔子若蜀葵若瑞香臘梅凡前庭所未備及茲亭
所再見者皆叢之羅羅清疎蔚然林立盖自亭之事畢

而花事亦遂告畢也則園成矣既竣役謀所以命軒與
亭者並園名之甕其園志習勞也樂聞其軒希集善也
可其亭雙江花果不減東陽也括以行行有得玩芝蘭
思德行觀松栢慕貞良也余公餘之暇以時燕息其中
或資於軒堂可容吾揖客矣室可還讀吾書矣或資於
亭亭宜酒宜詩鳥可催觴花能索句矣宜琴與棋梅鼓
其清竹諧其韻矣蓋擬之昔人盛山東園雖厥有間而
以爲用拙者蘧廬則亦芥舟之杯均也凡人性有甚近
隨其所處恒不能易其情故王子猷每借人居輒自種
竹余家海壖繫匏山郡竹木邱壑之趣未嘗暫釋於懷
今之爲此亦聊遂其性之所近非故以耳目謀煩茲父

老也然昔之在官者於廡宇有所修飾則曰以無勞來
者余豈家於官者哉區區之心或亦後之君子所共諒
乎是役也經始於仲秋既望告成於陽月上浣用日凡
五旬有奇而種蒔補苴之畧不與焉凡費俸八百兩有
奇而畚鍤與丹黃之事不與焉園庭花菓簡其類之微
者畧其名之復者凡四十種有奇而盆中之檜若栢與
舊植之柚若蕉不與焉軒深二丈廣三丈二尺劃其廣
而三之堂居其一則盈二室倍之則誦亭深一丈二尺
廣倍其深之半若軒之左夾道右隅室附於軒及亭東
之書屋附於亭均可畧也姑不書

吳綺甕園賦云青油舊幕本號芳蓮畫戟高門曾栽細

柳何年公府竟屬冶城此地華洲都爲釣藪春風大樹
誰來西第之車夜月胡床莫問南樓之酒事因時起輞
川得右丞而始居境以人傳平原非贊皇而莫有於是
天移憲節徑轉仙臺夜覩星芒望朱幡之使至朝看雲
氣遇紫帽之人來習勞勩於林泉躬親畚鍤試經綸於
草木手翦蒿萊歷久方成養竹樹有如名節因勞得逸
收高深並入襟懷則有亭號怡雲軒名待月聽鸚閣畔
廊數轉而仍通鬪鴨欄邊徑將窮而更折堂開醉白環
曲水以霞敷窓啟流黃向小山而電掣竹屏斐几入謝
墅以橫陳茗椀香爐在蘇家而並列若乃枝高玉蝶蕊
燦金鶯花異榦而香同誰能問種樹殊形而影密惟見

交柯入康成之庭草抽書帶繞安仁之宅蕙長雲窩處
處侵衣歲雖寒而翠滿時時壓帽春已盡而紅多別有
雀解知更鶴能識字迦陵送響六時和雅之音倒掛收
香百卉芳菲之氣隴山慧羽未肯嫌籠閬苑神慶還思
夾轂飛潛何意既共樂其生成玩好非私但相觀於茂
育於是凝香清秘退食從容散階下之吏人常來花裡
了案頭之公事似在湖中書豈能痴目長流而未倦詩
偏得瘦鼻自擁而恒工和逸調於阿鴻金荃霏壘聽清
音於小鳳玉樹菁葱加以地聳三臺江分兩派簾前山
色若見崔巍枕上濤聲如聞澎湃文如燕國信得助於
江山才似平原亦何殊於渤澥牙籤坐列嘯咏擁其百

城玉軫間調心期始於千載則可燕娛朋友延接賓僚
伴月香清是三洲之艾蒨吸江杯滿乃千日之葡萄自
譜新詞付小紅而度曲閑翻艷製共太白以揮毫葆萬
物之和常多暇豫後兆人而樂自得逍遙况乃天寶蔚
爲物華人傑因而地盛瓊英再發重敷婀娜之芬石象
叢生獨映婆娑之影春從秋至羨仁德之何多草藉木
榮知靈根之更永傳之樂府信爲君子之祥書載邦乘
豈非大人之慶也哉

丁煒甕園詩云運甕園初構重門隔市塵蜂鬚營壘濕
爲迹印泥新槿雨疎籬晚桃風曲檻春稍忻幽意愜何
事武陵津 一笏東軒地棲遲興自長風流規兩晉格

贛州府志

卷十二

府官廡

十

律和三唐簾靜芭蕉影庭寒橘柚香此中堪用拙莫謾
計行藏 虛亭還小築秀野彷彿林泉拓牖延山入移花
補徑偏曝書支石几揮塵響琴絃客至聊觴咏何愁損
俸錢 谷口懷空結名山願畢難寧知戶庭內容易得
林巒種石留雲宿憐梅秉燭看蘧廬随地有慙愧一枝
安 吳綺和韻云剪棘非耽寂園居辟軟塵樹從經歲
老花爲得人新消暇如增日和神以當春大夫頻退食
清嘯動江津 開徑偏宜曲爲廊不厭長竹深陰接漢
石老態頽唐兄弟逢連玉賓朋坐衆香主人能吏隱應
有異書藏 惟有江湖興看雲意輒怡但能爲圃好豈
恨得山遲白傅攤書卷蒼生看奕棋寧同摩詰牖蘭蕙

種黃瓷 熊一瀟次韻云隨地經綸設園林詎自怡四
郊蜚雁靜一院落花遲客醉登樓日兵銷賭墅棋閒情
偏有賦白雪映紅瓷 孟亮揆次韻云懸崖新架屋屋
裡瀉奔泉近郭幽棲穩居官樂事偏詩神真有畫琴古
亦無絃飼鶴平生好寧愁損俸錢 胡會恩次韻云巡
檐和氣霽鍵戶亦神怡綠袖含苞早紅蕉放葉遲曉山
頻拄笏秋雨正圍棋愛客開佳釀鶯黃瀉碧瓷 曹燕
懷次韻云結構皆幽境亭臺不染塵花陰穿牖濕鳥語
隔垣新月照烏皮几杯浮竹葉春東南推二僑並美躍
雲津 王潔次韻云宛轉循幽逕翛然絕一塵石斲蒼
栢偃門帶綠蘿新衆籟疑初雨繁英似早春吏仙稱閔

苑行役問迷津 張豫章次韻云詩傳摩詰畫禪悟趙
州茶二仲來三徑雙丁在一家谿山添逸興結構洗鉛
華辛苦王新建當年此建牙 陳維岳次韻云每閱圖
經載常懷九十泉興逢山簡劇狂許阮咸偏捉鼻歌團
扇科頭撥玉絃此間堪嘯矚不用杖頭錢 查嗣璫次
韻云水接雙江遠山連五嶺長高軒依翠玉歸路隔錢
塘亭可留竒字齋應署妙香十千金谷酒小史可能藏
王士正詩云初來甃園裡早愛甃園詩夜雨前山過
青苔滿院滋故人傾外酒名卉發辛夷物候炎方異春
風生桂枝
康熙三十八年己卯副使劉蔭樞繼治顏之曰惜福五

十年辛卯少叅陳良弼增葺築臺曰來爽乾隆五年庚申副使青阿立重修建文昌閣於東南隅二十四年己卯分巡道董榕就署東累土爲山下爲池因鄉邑有豐臺漚水遂名山爲豐臺池爲漚池右闢蔚喬軒援琴室取王守仁思歸軒賦中語爲迎養處二十五年庚辰內署燬守道素章阿重建

董榕甕園豐臺小築詩云花塢城南揆杖扶釣遊庚水介長蘆衙齋小築娛親境題作豐臺伴鬱孤書覆南來問豐稔使迎北叩祝團圞正看禾秀歌華黍好結稷亭號采蘭豐臺午日次敬軒韻云甕園一簣報新成正位蘭芳蕙有英客識懷鄉瞻闕意人騰衢舞櫂歌聲

循陔吟望倍含情

贛州府志

卷十二

府官廡

十二

治慙永叔非晞號筆點僧繇最擅名催雨驅濤睽衆妙

分守嶺北道在贛院西明嘉靖三十七年戊午叅政袁襲

裳建國初兵燬缺亦裁今贛縣造設兵房即其舊地

布政使分司舊在城西南久廢

贛州府舊治唐以前無攷咸通七年丙戌太守隴西公因革廡署立食堂環以高樓孔目蔡嗣立記未詳基址所在舊志載府治在城北隅鬱孤臺麓即盧光稠使宅俗呼爲王城其前數十弓地甃甕城後節使撤遂爲州治按咸通間太守只載陸肱一人今稱太守隴西公不知何指而蔡嗣立爲孔目在咸通十三年正作記之

歲也又攷盧光稠據城自稱太守距咸通時纔四十餘年則防禦使宅當必因太守廡署爲之疑基即在此故併爲一綱

蔡記云京百司至於天下郡府有曹署者則有公厨亦非唯食爲謀所以因食而集評議公事者也由是凡在厥位得不遵禮法舉職司事有疑獄有寃化未洽弊未去有善未彰有惡未除皆得以議之然後可以聞於太守矣異乎小庇生靈以酌寸祿豈可食飽而退羣居偶語而已况虔居江嶺地扼咽喉有兵車之繁賦役之重苟一物爲害則萬姓何辜一綱不提則七邑何守同舍諸公得無屬意焉小子承乏每慙尸素志求短拙憂心

忘餐或有公事之稽留獄訟之寃滯六曹之臧否百姓之慘舒農桑之失時鄉閭之蠹弊聞見所未及才智所未臻希會饌以言之共裨風化院食堂舊基圯陋咸通七年夏前太守隴西公遇時之豐伺農之隙因革廡署爰立茲堂環之高樓翼之虛楹有風月之景花木之陰無燥濕之虞墊陷之慮聚於此者得無愧焉處廣廈宜念巢居露宿者食兼味宜念糊口甑塵者夏清涼宜念曝日而耕者冬溫燠宜念卒歲無衣者苟用心如是則日食萬錢無以愧豈惟公饒哉自建創之後於今七年未有紀述深以爲缺小子伏役之暇好讀書爲文雖顧不才聊用宣錄咸通十三年五月三日記

宋嘉祐間知軍趙抃葺治□建思賢樓手植七松因以名其亭紹興間知軍曾慥□葺慶元六年庚申張顯謨改燕喜堂爲章貢道院楊萬里記嘉定間趙時逢改思賢樓爲東樓左有月華樓知軍胡築建樓下有朝徹堂堂後爲欺春亭又後爲曉光亭治後有翠玉樓淳熙間知軍留正重建取蘇軾山爲翠浪湧水作玉虹流句名之樓下有袞衣葺燾堂知軍留元剛從祖留正出守後又迎父越師就養故名真德秀有記又有皂蓋樓亦以蘇詩名元末燬

楊萬里章貢道院記云贛之爲州控江西之上流而接南粵之北垂故裏顛一路之兵鈴而外提二境之戎柄

其地重矣邑十而長疆袤而阻物夥而昌其事叢矣民毅而直小誦也見於色小伸即釋前以義而激亦可以氣而息其俗古矣地之重事之叢俗之古故視邦選侯此他郡爲艱慶元五年前尹直秘閣郎中三山彭公改帥五羊皇上命祥刑使者華文大卿雪川喻公兼領府事盖弄印不畀者將朞逮十有一月以畀今尹右使舍人括蒼張公公來之初延見士民覽觀風謠愛其質直信其無諛則籲其耆老而稔之曰爾之所大欲將無在於父母妻子之相安乎將無在於衣食温飽之不匱乎將無在於刑憲訟繫之無厲乎皆對曰諾公退而喜曰謂贛民未易治者皆謗吾民者也即表聞於上曰凡厥

有生性皆本善又曰若先以小人而待人豈古者良吏之爲斯言一出十邑之民以手加額家傳人頌楮生毛穎其價十之於是一令無出出而必承一政無行行而必傾無改民勇勇於孝弟無息民争争於耕織年穀大穰盜訟頓清未朞年而贛之治聲以最聞焉於是一府之督郵從事皆賀公曰公之表詞人始而未信中而信且疑今罔不信矣非夫人之信於公而公之信於人非夫公之信於人而公之信於心也大哉心乎以政化者揉木之柱以心化者以枹召響公笑指其燕喜之堂曰此非燕喜之堂吾州之道院也賓皆曰然遂易其扁曰章貢道院而以書屬予記之則書其所聞以復之公名

顯謨字子知予友善今二十年云庚申十月十八日

按張顯謨知贛州軍舊志與孫炳炎以下十人俱載咸淳間任而顯謨則曰貴謨據楊萬里章貢道院記明載張公名顯謨而贛縣古蹟志亦沿其訛又楊記明載慶元五年爲己未以畀今尹右使舍人括蒼張公慶元五年爲己未而作記即次年庚申十月十八日距咸淳元年乙丑已六十六七年其爲訛舛明矣張尚瑗曰舊志文天祥以咸淳十年任次年恭帝即位改元德祐矣何得此後贛守十人仍載咸淳間任是張志固已疑之但未經辨明更正又以顯謨爲貴謨與記兩岐耳

宋文大祥翠玉樓詩云昏鴉何處落野渡少人行黃葉
聲在地青山影入城江湖行客夢風雨故鄉情試問南
來信梅花三两英 和胡端逸韻云客影魚千里年華
柳十圍白雲棲石密黃鶴出煙微江海秋風老湖山晚
日暉鬱孤臺上望野濶犢初肥 翠玉樓觀雪詩云矯
矯臨清泚濛濛認翠微綈春生客袖鐵冷上戎衣柳眼
驚何老梅花覺半肥新來有公事白戰破重圍 翠玉
樓晚雨詩云晚樓一曲轉梅花官事無多報放衙林木
蔽虧煙斷續江流曲折雨橫斜年華冉冉風前影歲暮
悠悠客裡家一鴈近從沙嘴落更饒片雪入天涯 皂
蓋樓詩云一水樓臺繞半空圖畫開蜗涎行薜荔雀影
上莓苔碧落人千載青山酒一杯晚煙看不盡待月却
歸來

明洪武初興復舊治建堂其北榜曰清獻以志景行又
於儀門左合周程趙爲三賢堂成化十九年癸卯同如
王廷珪重葺泰和劉鴻記嘉靖三十二年癸丑知府李
丕顯建贛郡正佐題名碑自爲記萬歷十年壬午知府
徐應奎重葺前爲清獻堂中爲川堂又後爲思補堂翼
以兩廂曾同亨記

李記云自秦罷侯置守歷代沿之然則守之職古之大
侯國也國朝稽古定制守不易位倅以下易名秩叙任
有專職而皆攝之於守守所以一寅恭而存國體雖非

古者君臨卿卿臨大夫士之制然其職同歸於不惟逸
豫惟以亂民者責惟均哉贛郡隸古揚州之域其形勝
據江上游其爲屬凡十其地膏腴極千里會其里籍戶
口之數不及吉之一鉅邑然而藪澤之鍾棟隆之備米
鹽之利皆足以下給諸郡故吏之役茲土者罔不以艱
劇自疲而爲大曹者則曰是地非其人不輕任也嘉靖
壬子余自河南汝寧復守是郡越明年癸丑犴狴多清
士民無瘵惟六月乙未歲且有秋殷土咸慶庶寮交頌
咸旅進謂予曰惟贛郡爲古虔州之地入國朝循爲今
郡守土之吏不旬歲凡屢易庶寮熙載各率其職盖凡
百九十年於茲爾然而郡治無題名顧不爲古今一闕

典哉余惟唐虞三代之世無題名而臯夔稷契相繼並
登不曰同寅協恭和衷哉惟陋巷之士無題名而顏閔
之徒各以名顯名之有無固誠不足爲世重輕亦存乎
其人而已茲予與二三若寮固皆海內人也萃精會神
相聚於一堂之上自夫天下而視之一家也遡觀往古
以遞今來後先邁會凡聿樹勲於贛者自夫古今而視
之一旦暮也先後不同時而均於體國正倅不同官而
合於盡職茲固今日題名記之所由立歟余又按贛之
故事昔趙清獻爲守而濂溪判州事清獻公相握甚懽
大恨其相知之晚盖昔者監司之勢嚴而今守判之情
親故也詩曰伯氏吹埙仲氏吹篪及爾如貫夫同寮之

分情則兄弟也義則一貫也情親則其勢足以相聯義嚴則其分不至於相踰此其職誠足相湏而其事誠足相濟所以合寅恭而齊萃渙之意嗚呼茲又今日題名記之立余必欲合正倅而□之也言既同寮遂僉謀伐石請紀余言 曾記云贛據章貢之會縮江楚閩粵四省之衝寇警以非時至國家特建督撫重臣提兵其地以重彈壓至郡長吏非負才宏鉅寃安攘之畧無以安集流亡計殄草竊用副聖天子慰安黎元至意故其地在豫章最稱嚴重郡舊署在城北隅相傳爲郭璞所建入國朝來凡三修至 字闕 制乃大稱見吾徐公典

郡之四年爲萬歷壬午秋八月守吏不戒前後燬於火

燭廡庫

闕

諸廡舍如故藏金公移一切無所失公

坐是得道於吏議譚者謂非公德政所感召宜不至是然公不以其故自解閉閣省愆凡累日夜吏民以營建請曰時詘舉羸春秋所戒茲惟不穀奉職無狀所繇至何可以勤我吏民第需之明年癸未歲大熟吏民更進曰古者師帥坐鎮堂皇向明出治等威有辦法紀森嚴故能使遐邇向化境內乂安明公獨孜孜務且夕與民休息不欲以煩費困我吏士以致出政臨民經時以來跼躅旁舍褻尊示玩非所以令衆庶見也且贛古號要害非他郡比宜及時繕完肅視聽備不虞以順衆志公唯唯適三臺諸司檄交下如吏民言且爲捐帑金佐陶

梓費公不得竟謝乃以是年十一月選材徵匠蠲吉舉事前爲清獻堂之楹中爲川堂又後爲思補堂翼以兩廂式廊視舊悉出公所叅定其他漫漶不鮮者以次加飾於是郡治突然改觀矣越歲甲申六月工既訖公屬書函幣走使桐臯山中屬不佞同亨爲記歲月予惟適然之遭自昔聖賢所不能拒惟是消弭難本其道何如耳故春秋所志災異類多因時記載以備故實非一一有所譏諷以警動有位今其書具在可考而知也若夫自昔牧伯守宰惠澤在人或徃徃藉災異故得以彰顯如劉昆反風宋公有至德之言三熒惑退舍其事著在史冊艷傳至今公以君子長者之道爲治在郡數更寒

暑省刑緩征興學育才剔蠹興利寢不急之役罷無名之供四野晏然盜賊衰息和氣所召故能轉移猝至之患於呼吸間使菑不爲害視熒惑退舍與反風事歷千數百年若出一轍至舉艱大之役於七十餘年後歲適連稔民樂赴功無藉申督刻期底績即古之循吏勞民於事變倥偬之際其得人心宜無能逾公者予故備書之使後之人考建置始末因以知公感孚之效而守畫一之規者可不下堂得其所用心將虔人席公併幪之惠又寧有涯哉是舉也凡用緡錢一千三百六十兩有奇役夫一萬三千三百有奇董其役者營度規畫爲別駕蔡君以通觀其成者爲別駕范君儀鳳司理柳君希點

例得並書公名應奎字汝祥浙之鄞縣人隆慶戊辰進士以才諳著稱於時今擢廣東按察司副使異時洵登大僚誦公名業者且當自嶺南北始

明董天錫題雙江樓詩云雙江形勝玉虹流萬戶風煙繞郡樓自信雲霄無窘步極知廊廟有先憂公餘不廢登臨興宦況元非漫浪遊凋敝全甦今樂土循良深藉古諸侯百尺樓前二水通封疆千里屬觀風孤琴什襲堪隨鶴問俗頻煩好畫熊歌聽嬉遊忘帝力行看保障奏民功危闌徙倚瞻霄漢最愛祥雲捧日紅

按舊治後曰琴鶴堂左右爲幕廳兩翼有六房中爲戒石亭儀門東爲事友軒西爲清軍土地祠後堂之

左爲昌實庫右爲架閣庫又後爲府廡東爲同知推官經歷知事廡西爲通判照磨廡爲吏舍大門覆以樓東西爲榜亭前左爲申明旌善二亭司獄司右爲陰陽學醫學前爲雙江樓明知府康河題額又前爲四賢坊國初僅存府署東西官廡及宣明樓俱無存順治三年丙戌知府戴國光因俗名王城爲皇城涖任不敢入至僦居民舍十六年己亥張爾翮始詳請修復居之康熙十五年丙辰舒將軍督師鎮贛駐劄於此知府萬文麟復遷居府學明倫堂二十二年癸亥李文献仍入居之

贛州府今治康熙二十九年庚午知府任進爵以分巡道

改遷左有挹翠樓庭中大榕古栢皆數百年物左寮有
皂莢樹高三四尺配以英德石大亦尋丈知府王用霖
顏之曰清樾康熙五十一年壬辰知府黃汝銓構齋其
前歲方大稔題曰喜豐堂張尚瑗記

記云夫積貯爲天下之大命而饑穰爲天氣之流行源大則
饒源小則鮮故國以豐年爲瑞君以安民爲樂使服官
之士所至之地年穀不登民有饑色將焦然不安其所
又何從得所樂而樂之贛爲壤既瘠且貧無金錫之珍
魚鹽之阜畜牧駒牝之饒織文機巧工技之利厥土惟
宜稻穀其民惟深畊疾耰農力爲務形勢名爲澤國而
居上流山長谷荒相連屬無巨浸深藪陂澤之鍾堤堰

雖設灌溉不過數十百畝其農經畊具亦限於地勢無
版牌桔槔增水減水救旱防災之法一聽天時之熯澇
雨澤之後先相率爲饑穰而坐視其盈絀十一邑產穀
之區連舫建瓴下於贛郡郡與省會旁郡吁吉頗仰資
焉南流而下者兼達於閩廣之汀潮而汀潮吁吉之穀
不復轉給於贛當其有餘不能儲蓄以待匱一不足則
嗷嗷疾視而莫可如何故贛民之望歲也視几爲農者
倍切而守土於贛者其先憂而憂後樂而樂亦不自禁
其用心之倍勞郡伯黃公蒞贛謀葺官舍夏方旱得雨
歲乃大稔秋穫加於他歲堂遂告成名之曰喜豐以尚
瑗從事郡乘之役命書之以無忘名堂之義瑗作而言

曰休茲知此者鮮哉瑗不敏待罪興邑九年矣其始至也值大祲行糜賑廩日不暇給蓋以憂始者也荏苒積歷幸無衰惡如今茲之有年者亦僅再見或蒔而萎或耘而稿躬勸步禱靡歲弗屆蓋繼之以喜懼并者也今也庇公之宇而荷公之休將自今以始歲其有其爲喜也何可量哉夫民之望君也如望歲焉故穰田者操豚蹄占年者拜鷄骨君子之愛其民也如植嘉禾焉故豐樂以記其亭稻孫以書其樓周頌有豐年之章小雅曰田峻至喜公之所以名堂者意在乎斯也春秋僖公二年十月不雨三年夏四月不雨六月雨不雨者勤雨也閔雨也雨云者喜雨也於喜而致閔之勤之之思焉此

公所未言而瑗爲公推之可以得公之志者也

雍正五年丁未知府高遐年建箭亭於署左九年知府魯之裕砍伐皂莢古栢以挹翠樓爲箭亭清樾喜豐二額俱廢乾隆二十三年戊寅知府栢超重修三十九年甲午知府吳山鳳詳請預支養廉重修四十一年丙申知府竇忻續工繕完復立清獻精白堂額題思補二字於西廳月香軒自爲記

記云郡廡之可攷者斷自唐今鬱孤臺麓之考院其舊址也明以前皆治此國初守以廡圯僦民舍以居或假府學署聽政至康熙二十九年任公進爵始改遷道治閱今八十有九年矣中間蒞茲治者隨時補葺舊志

新治建置僅一二見豈以遷治從因小有興作可略不書耶乾隆三十九年甲午前守吳公山鳳迺援例支廉大加興修治事之堂退公之室幕舍書房吏宇門墉屏轅皆經冊報費幾盈千而吳公擢驛鹽道去余視事又二年於茲次第捐廉復葺其前此之未完備者於是堂額題聯增飾懸掛而今有修志之役不可無以記歲月書規制也按今大堂順治丙申巡道史公燧舊題曰廉威攷舊志堂額取趙公抃謚號題曰清獻余擬重立於堂以志景行焉二堂舊題虛白今則曰精白堂余新之題其聯曰蒞三賢之舊封當念前型不遠統九邑以宣化恒思稱職維難堂之東爲箭亭舊有額曰氣體和平

余題其聯曰風迴鶴舞摩霜翼月照亭閒掛玉弧堂之西廳爲月香軒前守吳公因亭前雙月桂而題也余亦題一聯曰虔城雨過雙江濶燕桂花開一郡香又別懸思補二字於前簷志載舊治廳事有思補堂余深有味乎其言故懸此而跋其後又其下爲客亭爲靜治堂月香軒之後爲幕廳二堂之後爲內署有室有樓此府今治之大較也獨惜治左喜豐堂挹翠樓久廢堂樓前之古栢與皂莢老樹皆無存而大榕垂蔭月桂噴香婆娑芳馥於治之左右猶令人有封植之思焉古之爲治者治以政先治以心心者政之所待以區畫措置而所居則其布政設施之地主之以理而以至誠將之此心庶

幾其可以與民相見矣故夫子之勗子張曰居之無倦
行之以忠忠者誠也一以倦心乘之不能積之以至誠
則政之過舉有不日叢者乎趙清獻畫之所爲夜必焚
香告天明乎天心與吾心實相表裡有不可告則過先
在心而政可知矣是以夫子又有補過之訓過已形而
補之猶未晚過未形而思補之則求有過於無過中精
之爲克己復禮之道即天下歸仁亦莫外於是旨哉補
之義甚大而思之念愈深哉余居是廡而坐斯堂清獻
之爲政風流其先型也由清獻焚香之念追溯夫子無
倦以忠之旨不敢云行政之無過或者惴惴於有過惕
然知所以用吾思旋思而旋補之以竊附於善補過之

學即心即政敏簡交持少可以告夫而無愧矣乎贛轄
九廳邑一郡政事總滙焉豈惟余當存此心凡我寅寮
願共矢之爰因記修建規制歲月並揭其義而勒於石
乾隆四十三年戊戌夏月 又思補額跋云委蛇退食
古大夫著羔羊之風而進盡退補又示人臣匪懈之誼
道固並行而不悖也贛郡舊治有思補堂額見於曾公
記中後遺無存今署西偏燕喜之室古桂二株月一噴
香前守吳公題曰月香軒余奉

簡命來守是邦念嶺北大郡政務殷繁夙夜切匪懈之
誠不敢賦委蛇勤思補余過焉因復懸是額期以自警
云爾

按今府治在城西坊前爲屏牆東西轅門轅以內爲頭門內有班房二排進爲儀門右官廳一所左爲土地祠內爲兩廊書吏科房又進爲大堂前有捲棚有內官廳右爲庫房又進爲二堂東西廂房堂東爲廚房爲箭亭箭道堂西爲書房又西上爲幕府中爲花廳月香軒左有遊廊下爲客亭爲靜治堂二堂後爲三堂爲內署有室有樓左有小廊右有小房東西各有廂房

督學考院舊爲府治康熙二十九年庚午府治改遷巡道署遂改舊府治爲考院四十年辛巳知府謝錫袞增建兩翼東西文場乾隆七年壬戌知府汪宏禧重建東西

文場前後兩楹自爲記

記畧云贛州試院係舊府治康熙二十九年知府任進爵更改兵巡道署以爲府治而舊府治爲學使公署知府謝錫袞增建兩翼東西文場多置坐席每遇歲科試修葺規模湫溢不足以容多士而棟楹朽腐殆不可支乾隆七年紳士倣南康廣信之例以童子府試就試本邑委令代考節省道里客舍之資爲重建考棚計合辭而呈之郡守觀察朱爲郡守時轉申之撫藩臬各憲僉曰可於是計議以定量力勸輸而選材鳩力擇吉開工尚未次第以舉是年秋予來守此土檢閱申文公輸未納督學按臨逼期是不可緩爲之檄催公捐日夜展力

選各邑中諳練之士董其役工未竣而使者刻期以入會霽雨浹旬風伯逞威幾令司事者無所措其力督學歲試事竣復掃除其跡而更張之昔人云冬則寒沍僵裂不知爲體膚在夏則蒸薰腥雜汗淫浹背所置坐席倉猝取辦臨時規制狹迫不能舒左右肱又薄脆疎縱據坐稍重即恐折仆不幸坐漏痕承簷所在霖雨傾注其苦不可枚舉予爲諸生十餘年雖不敢謂備嘗亦領其大槩問途已經寧不以此爲鑒爲諸生去艱確而措盤石條其綱紀而盈縮焉齊其法制而整頓焉缺一不可也凡大門儀門左右側各置官廳以及土地祠號房等下及輿臺皂隸之房無不位置得宜甬道左右相去

數十武而擁擠之患得免焉儀門內設龍門一座藻繪雖屬外飾以之鼓勵多士亦必至之文耳至於東西文場尤屬注意之所分前後爲兩層橫十六楹縱百六十楹皆丹其色屋瓦魚鱗莫不整密其兩層之中有水溝濶數武上免接簷漏痕且容日光下徹地勢直瀉大雨不使水溢諸生出入自如無摩肩格肘狀憑几木厚六寸許濶二尺許以巨石爲脚周圍鐵環鎖如鼓鑄者然拭几倚案毫不震動坐席木濶厚皆尺許無折仆患號口屋簷編竹爲篷以屏日色蔽風雨上書字號大如斗舉目朗若列眉巡場吏立甬道觀望如星羅碁布勢無遜形文場至此可謂爽塏也已大堂重簷高接望之深

遂較舊制爲宏。廡二堂三堂左右房極軒爽。使者下榻之所。膳食之宇。以及連幕分校。綽有餘地。後一層樓高數仞。又極峻且壯。旁置庖厨僕夫之室。並選材爲之。統計試院前後五層。東西文場外堂屋舍宇五十餘間。共用白金六千兩。有竒。始事於乾隆七年九月。告成於乾隆八年七月。是邦山川煥綺。將於是乎鍾其靈。人文炳耀。將於是乎覘其盛焉。贛州紳士丐予記。予記其輿論之合。公輸之勇。以爲多士登進慶。

權關部署在府城東南。舊爲坐營叅將府。先是嘉靖二十年辛丑。巡撫李顯檄建監權鹽廩。在城北隍隅。劉節有記。

記云。此贛郡恪遵督府中丞臺南李公憲檄。重建監權鹽稅廩也。贛故有廩。創建城北隍隅。監權鹽務居之。厥後室以火毀。地以鄰侵。遂湮廢。邇者廖倅長倫屢承鹽務。庶得其實。公牒以請。下兵巡孫臬副躬閱如議。僉謀重建。上覆得允。迺事事歸於侵費。取於贖力。役於傭經之營之。拓之築之。勤敏節約。宏壯鞏密。告成於公說焉。束幣致詞。遣郡學弟子皮生金陵屬節爲記。迺言曰。煮海之利。肇於齊桓。征商之禁。甚於漢武。所由來遠矣。顧茲南海鹹鹺。商賈遷度嶺而北。國初立法。限以域地。罔敢私越。百年以來。議者數更法例。屢變至成化間。南安郡修闢嶺路。通商賈。始議立關嶺。下薄征爲費。羨

則雇役甦民困宏治間創設都院節制四藩開鎮於贛取給兵餉什之六七仍存其餘爲僱役直闕猶故也嘉靖改元詔令罷革督府籌策餽餉無所於給疏請移闕贛滸兼權二河公私之稅悉儲贛藏厥廼始立譏察益嚴筭無遺利比歲接應大工取供內帑什之七八餘以給餉雇役不暇及矣夫天下事輕重勢也緩急時也經權人也故征權之法始焉闢路以便商也廼復存其羨以僱役重在民矣繼而儲其贏以供餉重在兵矣今則納其有以充經費重在國矣時異勢殊行權以濟經也典司者知所先後矣然則贛郡監權鹽稅關繫最大計會愈密視昔倍蓰厥可湮廢弗加之意哉君子謂重建

斯厥有美政五而節財用省民力不與存焉曰足國用曰厚兵食曰通商利曰厲法禁曰絕奸宄是故奸宄絕則法禁厲矣商利通則兵食厚國用足矣五政之美有如此者至若周慮澤物興利舉廢以垂永久公之功大矣哉斯役也經始於嘉靖二十年三月二十六日比本年九月朔日落成地直橫深廣以丈計堂室左右前後以楹計周圍之垣出入之道以尋丈計凡若干詳於公檄可考也不書

國朝康熙四年乙巳以叅府改爲今署使有正副出入俱於大堂至二門而分正使內有二堂爲公暇理事之處三堂又曰亦蘇堂前葉映榴所題署東北有處士橋權

使宋犖構建以迎寧都魏處士後有種蘭堂盛符升建
白爲記又有關部司題名碑右爲君子堂建於前使顧
大申亦自爲記鐫於屏扉雍正元年癸卯裁部使巡撫
委員管理遂廢

盛符升種蘭堂記云虔地多蘭然蘭非虔產也昔宋人
譜蘭以產之閩者爲佳而閩人舟行必取道於貢江故
江上之人多以藝蘭爲業實不逮閩蘭遠甚今閩蘭之
流傳四方出自虔者八九則以行旅走集並在虔兩江
間也丁卯之冬余有虔江之役同年友勞君書升贈之
以詩有云公餘逸興多瀟灑好課園丁學種蘭亦慕乎
其名而稱之歟比余抵虔偪處庫舍鬱鬱不自得受事

三日即闢其後之廢地築室四楹名其堂曰種蘭而附
之以桂藁書屋不敢忘良友意也堂成有客過咤余曰
榦之官歲一易耳人皆傳舍視之而况所居之官舍乎
茲且構而飾之以貽後此不知誰何之人過矣又何知
後之人不庖湢其堂齋薪芻其草木耶余應之曰不然
天地之爲逆旅也古今之爲旦暮也人生其間亦何地
可以便安何時可以怠廢古之君子或所至洒掃或所
過焚香掃地所以淬厲其身心者無往不然余之官斯
地也雖以一歲去念此歲中所治之事有當興者有當
革者凡商民之利害皆當備悉而爲之釐定可聽其叢
脞焉否乎然則余之治斯堂也亦猶是矣堂之中有書

可讀有詩可詠有翰墨可以自娛治事之暇徃徃澄心
靜坐熟復其故業悠然如對故人堂之外有竹百竿□
花數十種林木陰翳雲山四望可騁觀而適志聊自解
其岑寂余固不能逆計夫後之何如然有以知後之來
者樂有斯堂必無異於余之今日也因取虔蘭之特秀
者列植堂前等其高下而復求之貢河以東如舊譜所
載高花濶葉玉榦紫莖森然畢具庶乎閩蘭之實克副
其名矣若樹蘭珠蘭風蘭之屬皆其別種又譜所稱品
外之竒也因述斯堂之本末而記之 關部司題名碑
記云贛之有關也自明宏正間始時方改食粵鹽設廠
統之而雜稅附焉每季以府僚遞領其事及王文成公

藉其儲胥用建大功而此關特重萬歷十年奏歸府之
判廳此專官所自始也 國初尚仍其舊至康熙二年
始遣部臣五年尋罷八年復差滿漢二員兼主之十三
年始專任一官佐以筆帖式迄今凡二十一差得部使
自張好竒以下二十八人筆帖式二十人追維所歷僅
二十餘年耳而或得其爵里或僅得其姓氏其行事已
日就湮沒自茲以往歲月逾遠將漸不可考因思共列
其名題之於石且俾後之君子同登是石以志前後寅
恭之雅亦官斯地者所樂聞也況此二十年中職事之
沿革額課之多寡不必盡同奉差者歲必一更而皆克
供厥職報最司農則其人之並爲能吏可知也其尤□

者爲商民所頌述東西兩津穹碑載道善政猶可考見則其人之並爲賢士大夫可知也安可不存其姓氏垂之堂廡間乎堂之東故有留清堂爲遼左蕭君所建本欲葺之以植是碑乃久爲圉牧勢難卒復因附立於種蘭堂之右倘顧名思義更加修葺尤盛事也請以俟後之君子 顧大申君子堂記云今上康熙之八年己酉予以分權來虔州虔之權故屬於郡倅二年癸卯始遣部使者已而輟八年而復遣邦人之視權使如過客其視使署猶郵傳也故署失守鞠爲茂草受事之初謀築堂於署之東偏經六旬而落成客有難予者曰部使者歲一遣甚暫爾君之興是役也有不笑其迂者乎且君

之奉使節於司空之庭者凡一再出所至必新其棟宇華其樓觀以遺其所不相知之人其說可得聞乎予曰唯唯古之賢人君子車轍所至類有遺跡以傳末世非以求自適也其大者明以脩則其細者必周以悉且如居室小節爾見以爲暫室廬皆傳舍也見以爲不可忽雖信宿皆以千萬年期之始予之董萑蒲於澤也官舊京冠盖聯絡騷人墨客櫛比而雲從朝蒞職事退而置酒作樂以豫四方之賓從爲堂而司版築於沛泗之交也跋蹇郎署已久抑鬱不當意潔躬劬修匡時之急朝蒞職事退而獨居偃仰圖史雜陳觴詠閒暇作爲堂焉前蔭高槐後臨深沼舟楫之所經未嘗不登而顧之也

於鍾阜一年而代代而去於泗濱一年而代代而去自
我去鍾阜之堂歲一易而往則竹刈爲薪羊豕芻牧其
上矣既而去泗水之堂歲一易而往則芳樹已剪曲池
已平蔓藪且盈於臺榭矣故每有改作人輒迂而笑之
其去也輒又荒而圯之而予不自怪且悔者非以適我
志異後之來者樂得而聞其人也今斯堂之成也僻在
荒遠廢輟不常又烏知今之游焉息焉者不更爲鹿豕
之宮藪蔓之野乎然我寧取此而去彼者君子之所爲
固不能爲庸衆人道也客曰善因名其堂曰君子相與
滿酌旅酬畢歡而罷

宋犖歲募集亦蘇堂詩云握筭真何補霜華點鬢新山

僧初薦果官閣正留賓心遠江湖狎時艱歲序頻自憐
餘賦筆收拾嶺頭春使院池上構小橋待魏和公詩
云秋水蒹葭極望遙新成略約一相邀他時應有閒人
說使院墻東處士橋魏禮次韻云編木橫池逕未遙
間來不待主人邀使君風度真夷曠夜踏青莎過板橋
麋鹿山林與世遙幽情偏愛使君邀蘇堤湖上稱名
勝雙水千秋有宋橋盛符升君子堂行云君子堂何
煌煌丹青列翡翠粉墨懸清光煙雲生几席畫壁尤琳
琅一顧一回首三絕思長康我友雲間顧水部炯如米
玉相矜許瀟洒一官任所之驚才逸興誰堪伍少年持
節駐長千架虹激水環花塢再筦河漕出夏陽亭臺屹

作湖山主一時觴咏盡名流相從高會成
今朝我作虔州客東廂卜築觀遺跡
如對故人眼倍明風流詞翰欣晨夕
勝事還思屬後塵蘭堂桂館交枝格
焚香種竹有同心傳舍何妨留歲月
于時左右兩巋然並向空山峙古虔
屋梁月色思良友俯仰存亡二十年
君不見江州刺史有山房鹿去書留
雲錦旁又不見眉山水部來楚黃十
畝東坡一雪堂種蘭堂成詩云于役
來虔上棲遲迫歲陰誅茅初結宇移
竹乍成林傳舍誰賓主蘧廬共古今
焚香還掃地去住總關心一官聊寄
跡卜築待何人棲息從今日優游屬
後塵江山樞鍵古花木歲時新笑語
宜君子蘭心許共新

同知署在學使考院左康熙中同知顧岱建青霞閣魏禮記乾隆三十八年癸巳改設定南廳舊署今改清忠祠魏記云江西地形散弱唯贛扼兩粵之吭九江吳楚門戶號稱形勝九江貧瘠然臨江漢之水北面匡廬足眺望之美贛山水無聞於天下而東西二廣貨貝出入爲湖西一大都會所屬十二縣多負山阻險盜以不時生發官茲土者治簿書獄訟兵刑之具日不暇給以文采風流名於時者蓋亦罕矣比年西南多故贛屬縣盜賊暴起尤劇無錫顧公以太府適丞茲郡受檄剿且撫之旌旄來往不得煖其席而民政之暇則又未嘗一日廢書延見窮廬之士相與咨詢民之疾苦講論古人所以

爲文章之道於是即署東偏建閣爲著書處名以青霞
青霞者公家園以名其草堂者也予以事過郡公聞而
先臨因報謁得登斯閣則贛東南諸山章貢二水井閭
萬家皆可坐而眺焉無錫山水名天下予嘗一至其地
樂而忘返贛不足當百一而公顧以草堂名其閣其將
寄諸家園以自遣耶抑地小二羽旁午不足展公之志
而幡然有鄉土之思耶抑又以爲樂山水者得其意贛
與無錫將無以異耶予去年至九江破碎已甚江西唯
贛爲勝地所恃以爲上游之鎮非公安定之而誰任其
慎無有鄉土之思也予既歸翠微山公以書來命曰爲
我記之按署東偏舊有煖雪亭亭北古木一本南一老

梅皆雜蓁莽中公闢地除葳建斯閣實亭之左岡云閣
下爲周廊覆以蘧笛如舫曰半舫園曰誰園乙卯七月
通判署在同知署左舊爲推官署署內有愛蓮堂前臨方
池宋羅願判贛州時構建

教授廡在明倫堂後 訓導廡在明倫堂儀門左
經歷司原無衙署康熙五十三年甲午經歷李希鈴捐廉
同紳士劉宗哲曹雲客價買北坊湧金門佟公祠地修
建作署乾隆三十二年丁亥經歷周嘉運請支養廉重
修

照磨廡在天一閣後 國初創造乾隆三十二年丁亥照
磨鄭燧請支養廉重修

府通運所在西門外久廢

府僧綱司在慈雲寺 府道紀司在祥符宮俱廢

贛縣官廡

贛縣治在城東北宋瑤記云舊在白家嶺元大德三年己

亥改卜今治燬於火至順三年壬申

各志作壬辰

總管教化

的新之 明洪武中知縣崔天錫陸賢又新之宣德七

年壬子新於李素景泰五年甲戌新於邵昕成化中知

縣何文縉建皆春堂題其額司空董越記宏治四年辛

亥新於黃世忠嘉靖元年壬午新於何正

董記云皆春堂在贛邑治後今令五羊何侯所扁也侯

之言若曰民之命懸於吏猶物之生待於春春之言蠢

贛州府志

卷十二

贛縣官廡

三十五

也物所由以蠢動也物必蠢而後動而動之必以春春
非自能動物也因天之元用天之命而氣以宣之也吏
爲天子牧小民宣德化而不能如春之熙然以施盎然
以育則其責固有所未盡矣故良善安業吾植之欲其
安吾之春也顛連無告吾養之欲其圉吾之春也強梗
敗類吾去之懼其撓吾之春也凡窮山荒谷之不易達
縣令刺史之庭吾視當不異於一家之赤子而早作夜
思惴惴乎惟恐其不能及故揭皆春於楣庶與二三寮
友朝夕顧諟以自警固非敢爲夸大也願有記夫春之
字見於昔人所取非一大率皆自氣之和言之如所謂
與物爲春有脚陽春之類是也氣不和則戾不節則流

斯二者皆非天之道而人所當法者然春之可以包四時政猶元之可以包四德故夏之長爲春長也秋之斂爲春斂也冬之藏爲春藏也凡其所以爲慘舒爲榮悴雖循環無端要之必有元亨以爲之通而後有利貞以爲之復是春尤爲天地仁育之氣所謂以生物爲心者也吏之於民也亦然仁以育之固其宜也必正以義斯不過節以禮斯不泆和以樂斯不淫殺之所以生之勞之所以佚之喜怒賞罰又所以扶持而安全之於天之道庶幾無背而春之仁育可法以施不然有愛民之心而民將不被其澤矣侯之堂而扁以今名其亦有見於此與堂廣不盈數丈而古槐之出廳事佳木之秀前榮

於皆春蓋不能無助而侯之取義則不以斯侯名文縉字德章成化戊戌進士廉而有威寬而有和人也觀其所向蓋可以知焉

國朝初燬於兵順治十六年己亥知縣楊文正復建康熙五年丙午知縣王枚增建後堂額曰廉德二十年辛酉知縣劉瀚芳又新之廳事曰忠愛堂兩翼爲吏舍前爲戒石亭儀門東立土地祠寅賓館西則爲犴獄康熙五十年辛卯知縣楊玠復建皆春堂南昌裘吉光復書之旁有架閣庫又後爲縣廡舊有虔南首邑坊今廢乾隆四年己未知縣張照乘建宜樓於署後建魁星閣於儀門左十八年癸酉知縣沈均安建分綠山房於皆春堂

後承以小亭曰雙清復於縣驛左建青龍亭屏牆左右爲正德厚生強教悅安虔南鎖鑰嶺北咽喉二坊四十年乙未知縣衛謀請廉修整完備改建大門升高數級署左舊有縣丞典史廨右有主簿廨俱廢

縣丞署舊在縣治左宋紹興間燼於兵淳熙四年丁酉縣丞孫逢辰重葺十年癸卯攝縣丞曾丰作丞廳題名記國朝康熙三十九年庚辰缺裁廨廢乾隆十九年甲戌裁倉大使復設縣丞改丞署於倉大使廨在城東坊大濟倉內

曾記云贛爲縣古矣本朝太平久自紹興迄今五十年間兵一再變百廨俱燼縣治且復故丞水廳也最後葺

贛之陽其山秀絕爲崆峒縣治丞簿廨向焉丞居其正凡廨得山爲對難矣况正又秀麗此好事者所羨也故葺後輒爲臺府二幕屬迭假更據丞力不能相挽抗姑就市廬以居其廳葺否未嘗問何暇推彘閱幾丞來與去閱幾歲月哉胡君鎬以下連三丞改秩去好傳致者或謂崆峒宜丞也丞委之以不知德崆峒者孫君逢辰於是出力焉淳熙丁酉廨始成又連兩丞改秩去好傳致者舉爲崆峒矣夫丞漢秩四百石耳不足取重於人故好名士類不屑爲或爲之上官視其御徃徃易其人故少有獲進者偶有焉又轉而德崆峒山嗚呼士爲世出顧所立如何所立是進不進非所計者丞寧有重不

重山寧有宜不宜哉庚子臘子來視丞事按令首問常平錢穀曰隸於州丞不與也次問陂池曰贛泉田也無以陂池爲鹺茗事大抵於郡丞理之稅青苗併一歸簿至獄訟令又自任丞褻手可也每坐曹呼吏索常行署罷踞繩牀對崆峒哦五七言詩答燕間佳客至即留與商畧饑共飡不擇糗渴共歡不擇滌主人倦輒卧若忘客在客喜輒謹譁若忘主人在癸卯臘吏以終更告予不覺其久也爲太息吏又追記晷之爲丞猶及識者以告曰今閱五十二年凡閱十七丞矣倘自紹興溯贛之始爲縣又不知閱幾丞寂無聞余重太息來爲丞者袞袞十百千年後溯至今亦不覺其爲久也余雖自磨策

顧未知終有所立否若不爲可考者遺之安知不與紹興溯至贛之始爲縣類耶當又三太息不止也乃疏其所得於吏之姓名刻於石幸來者續焉

教諭廡在尊經閣左 訓導廡在敬一亭右

縣東尉署在城南近雷岡距橋百步宋乾道八年壬辰攝

丞田橡建知軍洪邁記久廢

補

洪記云贛尉分東西久皆治郡下仍其方以居東部廡殘於兵寄而即西偏蕭寺歷年所不能自還與西俱西地爽其實尉官椽叅軍氣力差卑碌碌塵間視景蚤暮勢不暇小有建立指日得踐更逝如脫兔郡縣之長吏固莫或知知之亦莫或問如是殆三十年予之來守也

事逮東江飛梁邑長趙彥仁始爲予言尉以東名官而強顏以西贅位無小於鬪觀不宜幸得從歸之正名居方畀橋爲安一役而兩利集計誠便於是尉官缺南康田橡捧檄來攝丞忘其身之羈畢力闕策徑行空曠地度可容百室者即日得南距橋僅百步民咸致喜或持圃券以獻古道旁出尚約畧可尋政走雷岡徑也藁蕪積五紀而口闕之定有數基具矣安所得屋郡有邸一區其左物或憑焉僦不售撤以爲之堂又取野廬三楹以立廳事費無鉅細皆我之自出蓋不伐一木而迄成吏士環居整比如翼過者輟步驩歎老道士年八九十目見葳就亦灑然以驚予曰人不難銳始久必玩假板

羸祿逆旅尸厥官且趙令君秩過期新令鼎來民聽向背真尉又叩境田不可留然皆曰即得斯役成吾願接浙去此予既共實味其言賞之以酒而爲書其事且告之曰國家方急材二子往矣乾道八年十月二十九典史署舊在縣署左今在北坊湧金門內長洛巡檢司署在大由鄉長洛明正德間遷黃金舖今廢桂源巡檢司署在雲泉鄉桂源舖明正德間遷駐攸鎮今遷於烏兜磨刀寨巡檢司署在長興鄉磨刀舖明正德間遷愛敬鄉石院今改爲長興司攸鎮驛在雲泉鄉

水西驛在西門外康熙二十一年壬戌燬
醫陰陽學僧道會司俱廢

雩都縣官廡

雩都縣治在南門內其創始年代名氏無考

宋紹興九年己未縣令董逵循故址建紹定三年庚寅
燬於寇縣令曾柬之重建元至元五年己卯監邑馬哈
麻撤而新之

明洪武元年戊申知縣宋宏改建正堂及頭門門上爲
譙樓成化二十一年乙巳知縣羅肆增建後堂宏治四
年辛亥知縣黃文鉞九年丙辰知縣高顥十三年庚申
知縣邵元灌正德四年己巳知縣劉天錫相繼新之嘉

靖三十五年丙辰知縣羊修移禁鐘於譙樓萬歷十一
年癸未譙樓災知縣劉昌祚重建額曰勤政邑人李涑
記正堂後爲四知軒又爲忠愛堂崇正九年丙子圯知
縣鄭楚動重建額曰作新後爲縣廡有思補軒日新樓
左有書房右有愛蓮亭亭西有池曰西園塘
李記云是爲吾邑麗譙之樓曰勤政者邑侯劉公所題
也邑介山谷間忽豁然中空羣山競秀若拱若揖一水
漪綠映帶其前登是樓扶輿之清淑四溢睫中矣先是
樓制高亢甚故老爲言頗不宜於出政之堂諸握符至
者率擬更之未果也侯蒞政之明年乃因天之時順民
之志一旦新之其材其食需之官帑而民不告勞焉樓

凡若干楹高若干丈廣視高之幾深視廣之幾周植重
欄可凭可眺予間從侯登之殊灑灑焉已目勤政之云
則竊疑邑固僻壤耳以侯其才卧治何有且自侯之至
斯也蚤作夜思軫厥民瘼裁冗惟嚴斥羨必謹自胥史
以逮輿隸防靡懈自國門以逮巖谷慮恒周某所有犛
弱困於豪滑者力爲伸之某所有劇寇潛爲厲階者蚤
撲滅之盖由今以觀四境晏然揆諸後樂之義非其時
歟乃猶操慮凜凜然者何也侯乃目予且笑且否雩即
下邑耳其列戶奚啻數千黃童白叟仰茲樓爲忻戚者
奚啻數萬也吾一念而弛政孰與理民將疇依且某忝
茲二三寮窠之上假令厭苦民事身先之謂何而矧無

虞之戒封疆是賴簿烏能不勤於防禦也幕以贊政厥
匪易已尉烏可不勤乃事事也予曰嗟乎侯之言及斯
雩邑生民之福也顧聞之端範者捷於應善治者維其
風雩之竄且趨焉甚矣將亦有以挽之歟侯乃目予喟
然興歎夫自某守茲土亦恒習其俗矣鴻生偉儒寧鮮
異質乃竟一簣稱國華者何越數朞始一見也市井之
民不識耒耜其有事田疇者粵惟鄉鎮耳且惰而不必
皆上農也民既椎朴不善枝業乃又戀戀鄉井無或逐
什一於四方者若夫蠶桑之業闕然不講則俗所漸靡
遠矣故某登斯樓也既以省吾政亦以願吾民焉夫使
士誠親師取友矻矻窮年務修其業成其德將名世之

彥彙征起矣俗即不習工賈而地頗宜穀且易效誠令
惰者轉而緣南畝樹穀之餘繼以樹木地利不滋闢與
蠶桑即不宜於其壤而絺綌可爲畜牧易理苟闕政無
獸家其寢昌矣夫是四民者之各勤其業也非某勤政
始願耶予曰善哉乃亦有通籍巖廊隱跡邱園者將無
勤惕之誼歟侯曰士大夫者庶民之表率也仕則行其
學以尊主庇民居則履仁蹈義式是鄉人母隳行私室
母溷跡公家毋言財賄毋長紛華毋藉世資憑凌里巷
將仕於此者由之考政焉先生暨諸君子固兢兢於是
矣夫何言哉予乃拜手曰善哉敢不勉諸夫樓陳鐘鼓
以告晨昏者也侯偕簿尉聞鐘鼓之聲以勤其政吾儕

暨諸細民間鐘鼓之聲各無忘所有事將是樓之作其
有興乎侯名昌祚毘陵人佐侯成是樓者浙人主簿顏
鎮樹是石者閩人陳尉繪也樓經始於癸未春正月落
成於二月茲侯屬涑爲記記之

國朝康熙三十二年癸酉知縣趙愷重修四十三年甲申
水圯知縣盧振先重建

教諭廡即舊訓導廡在明倫堂左 訓導廡在漱公祠後
主簿廡在縣治東久廢

典史廡在故主簿廡前知縣宋宏建前爲正廳後爲宅爲
亭左右有耳房

平頭寨巡檢司今改爲興仁司在縣東北一百里宋紹興

七年丁巳□保岳飛創設元至元中寇燬至大二年己酉總管張武命巡檢張國用復建明宏治間知縣高顥復葺崇正十七年甲申寇燬國朝康熙二十七年戊辰巡檢高象震重建

青塘寨巡檢司在縣東北一百八十里宋紹興中少保岳飛平固石洞寇親帥麾下創築明萬歷十三年乙酉缺裁

印山巡檢司在縣東北一百四十里明洪武間缺裁

布政按察兩分司在縣治東五十步左右分列明初知縣宋宏建天啟五年乙丑知縣楊大名遷學於此崇正十年丁丑知縣鄭楚勳復學宮於舊地國朝順治十六

贛州府志

卷十二

零都官廡

四十三

年乙亥知縣李祐之建義學於此康熙二十年辛酉以按察分司祀知縣張澍專設義學於布政司址雍正二年甲辰知縣方景詡召租義學前店七間爲掌教俸今按察分司改訓導廡布政分司爲防守居
憲司明天啟間知縣姚紀改建縣治東城隍廟右國朝康熙四十三年甲申水圯知縣盧振先重建雍正十三年乙卯知縣傅誠改爲

上諭亭

陰陽醫學舊在縣治東明宏治間知縣林鸞建今廢

僧會司在福田寺道會司在紫陽觀俱明洪武十五年壬戌設今仍其舊

稅課局在縣治西十字街宋爲商稅務明洪武間知縣宋宏改創爲局正統間課不及額缺裁統於縣鄉會所在城隍廟儀門右

信豐縣官廡

信豐縣治在城東隅唐天寶元年建宋紹興四年甲寅寇燬縣令彭令重建嘉定二年庚午又燬縣令陳梓重建元至元十二年壬辰燬縣尹崔思孝重建明洪武十六年癸亥知縣趙仕宏修永樂十四年丙申知縣張穎修正統二年丁巳知縣謝洙葺廳事顏曰惠愛堂前有古榕二株後爲二堂又進爲燕居室東爲幕廳治內有挹翠閣宋縣令趙師俠有詞頭門建譙樓於其上額曰澄

清胡儼記正德九年甲戌知縣黃天爵撤而新之額其後堂曰披錦內署曰無倦又有味道亭臨清閣哦松亭嘉靖二十三年甲辰知縣沈學增建思補樓

胡記云信豐縣譙樓始自元至正戊子邑宰崔思孝偕耆宿曹文俊輩創建年久傾圮今令建德謝洙重修之聳然起一邑之瞻仰新田巡檢崇明顧宗叙觀其壯觀告於令曰斯樓成功不易苟無文字載之何以示後乃寓書於鄉人南昌學訓邵汝能來徵記樓之制廣七間高三十尺始事於正統丁巳三月十七日訖工於本年八月初八日凡材木匠石之費皆令之俸積也樓成前臨南山後峙浮屠碧桃之水繞其東九日之江盤其西

規模傑特簷阿翬飛丹碧照映於溪山之間起積廢於一新誠可紀矣夫譙望也一曰樓之別稱譙樓下爲門上爲高樓以望故美麗之樓爲麗譙世傳是樓魏武所造畫角三弄乃曹子建所誤所以警人於昏曉之間使之感悟而有所懲創至唐節度使辭日賜雙旌雙節立大纛入境州縣立節於樓迎以鼓角今郡縣有樓或置鼓角不過旦暮興息之候耳又嘗聞李衛公軍城及野營日出沒時鼓千槌凡三百三十爲一通鼓音止角音動十二聲爲一疊三角三鼓而昏明畢角音十數與子建實符今信豐之重建斯樓也於以出治教於以集史民於以書雲物皆有關於政事豈徒然哉若夫時和歲

豐民物康阜令與賓僚登斯樓覽觀山水從容宴樂以咏歌聖化慶幸遭逢於太平之世不誠盛歟是爲記國初燬於兵順治十一年甲午知縣陳誥創建後令楊宗昌完其工舊有縣丞署在其東今裁康熙三十五年丙子知縣方正玉改爲冰潔堂桐城張英題額教諭署在崇聖祠右乾隆四十二年教諭李霖重修大堂并建以文書屋 訓導署在桐山書院乾隆二十二年丁丑訓導楊大樞重修典史廡在縣治東南隅順治十一年甲午知縣陳誥重建新田巡檢司在巫山里距縣治一百里舊巡檢司駐處有四一在安息一在黃田一在潭塘一在桃枝今俱裁

布政分司在縣治西南 按察分司在縣治東今俱廢
陰陽學在故按察分司右

醫學在縣治東南久廢康熙三十六年丁丑知縣方正玉
重建

僧會司在城北寶塔寺 道會司在奉真觀

鄉會所在禾豐門內舊名會館乾隆五年庚申知縣李翔
麟撤而新之

興國縣官廡

興國縣治在城東南隅宋太平興國七年壬午建慶歷四
年甲申縣令程珣修

按程珣來知縣事在慶歷甲申通志舊府志俱載康

贛州府志

卷十二

信豐官廡

四十六

定中縣令程珣修今據鍾觀譙樓記及名宦志更正
慶元元年乙卯縣令解僖復修紹興十三年癸亥縣令
韓暉重修明自洪武至正德知縣賈思復馮欽陳璉張
廷珪曾選曾文煥黃泗先後修葺嘉靖中知縣李菽盧
宁繼新之萬歷九年辛巳陳文銓以會昌教諭來署縣
事又新之萬歷末知縣蔡鍾有構三程過化木坊於前
譙樓初建無考宋慶歷間縣令程珣改作明景泰四年
癸酉知縣熊鑑繼修邑人鍾觀記萬歷三十年壬寅知
縣何應彪重建譙樓下爲大門上置鐘鼓各一自爲記
鍾記云興國舊湫江鎮宋太平興國七年割爲縣因名
焉慶歷甲申大中大夫程公珣以大理丞來知縣事視

廨宇譙樓卑陋修敝補廢而改作之歲久傾毀紹興十
有三年殿中丞韓暉蒞邑重加修葺我國朝洪武戊申
邑侯賈思復因舊新之至壬子馮承事欽增修正統改
元莆田陳璉出宰一新廨宇惟譙樓未脩更漏不聞景
泰癸酉八桂熊公鑑奉朝命來宰顧瞻歎曰譙樓官民
賴以爲政委壞若是何以承宣德意而令斯民輒以興
復爲己任乃乙亥冬遂謀諸僚佐以身率先財捐己俸
勸富民以供工需僦民力蠲浮役以爲助下甃磚石上
柱棟楹落成於是歲子月甲戌耆老鍾仲珣王子昶等
合辭請曰是役也事集而民不擾宜有賀矧予等荷侯
之賜可忘乎願述以記之仰惟聖祖之制自京畿以至

驛傳衙門建置雖有大小譙樓之係尤重否則官僚無
以警夙興夜寐之思民庶無以起作息經營之志熊侯
斯舉豈不宜哉吾知自今伊始譙樓奕奕將以鳴更漏
而修庶政定昏旦而覺斯民豈徒一邑之觀美哉侯於
此尚其夙夜祇勤子養黎元使斯邑之民飲德蒙惠如
古之密邑中牟以著稱可矣他日徵拜大用以增太史
氏循良之書未必不本於茲也遂書以爲記

國朝康熙八年己酉知縣王璋改建廳事十七年戊午知
縣黃惟桂新之前爲戒石亭爲儀門兩翼有吏房四十
五年丙戌知縣張尚瑗次第營建吏戶禮兵刑工之外
增建鹽稅倉儲屯糧承發四房外立屏牆礮石鑄三程

過化四字內嚮古平固縣四字外嚮皆教諭裘吉光書
又改建譙樓自爲記宅門內有退思堂琴鶴樓順治五
年戊子燬於兵知縣黃惟桂建堂五楹後建樓五楹其
堂曰四知張尚瑗以朱子書牧愛堂榻本易之樓額曰
顧雲寧都邱成和記左曰方竹山房房有旁室曰菌雲
其前曰芥舟曰茅亭泰和梁機記亭外有隙地植花木
甚盛前令何振先構書室其中尚瑗以檢討朱彝尊所
書學海顏之邱成和梁機俱有記其西曰梓樹軒成和
亦有記署中又有覆笥山館尚瑗以面覆笥山名之陳
沂震記乾隆初年譙樓朽壞五年庚申知縣徐大坤修
自爲記

張記云柳子厚有言賢者之興而愚者之廢廢而復之
爲是習而循之爲非興國譙樓初創不可考萬歷壬寅
圯而復完以石甃其基不使易隳則前令四明何君應
彪之功鉅焉康熙癸亥真定黃惟桂修之甫即功而遷
秩以去繼治者弗事事常平倉隳弗克修廩穀無所貯
舉而委積其中霉蒸蠹蝕不浹歲而樓復圯今二十餘
年矣予始至署見其頽唐欲東仆隸以木搯之椳栴瓴
甌零斷朽壞不足蔽風日登之盡然生拂鬱之懷知更
者夜無所憇急欲謀葺治適歲荒民殫洪水齧城皇皇
於振廩繕隍終歲旰食無所暇次年民氣稍蘇則又先
其急者迨明倫堂社稷山川壇擯次第畢舉歲丙戌秋

暮乃議及於官吏廨署而譙樓爲最先先是謀於邑之
堪輿曾贊賡贊賡曰昔者黃侯之有事斯樓也吾從父
某實爲相宅面勢焉縣之堂寢皆五楹而譙樓獨三楹
弗稱黃侯曰力絀矣苟完而止猶愈於己今吾欲終從
父之志以大芘於邑人侯其不憚勞乎余曰謹奉教始
譙樓爲石基甃東西各一楹虛其中爲應門架板於中
衢共爲三楹余爲之左更達於左右更達於右架板各
一楹而五楹以成樓之製爲改觀焉爲飛甍者八加以
吻四舊制所未有也前爲䟽櫺十四後爲闔扉六及周
遭門楹舊制所宜有而圯壞無復存者一更新之如始
創焉既成而登之則千家之煙火熙來攘往可俯而窺

龍王潭之奔流詰屈朱華之山色翕艷壩南下壇之草
樹蓊鬱葱蒨皆攝於檐廡之內而知更戒守無或失其
昏昕者昔張忠定以萍鄉令張希顏更鼓分明驛傳完
葺聞而知其爲賢而王黃州之竹樓歐陽滁州之豐樂
亭俱以登眺遊觀吏民同樂爲得爲政之體若予也奉
職惟恐不及豈敢引前賢以自暇逸庶幾於廢者復之
勿爲循習以隳從前之成績斯已耳是役也耆老諸生
以建明倫堂費夥謝匱汔休所需工值皆予捐俸薪爲
之共糜縉若干計費如左康熙四十五年十二月朔日
張尚瑗牧愛堂詩云寶翰前型在懸題意悚惶書城箴
保障墨稼憫耕桑廨古慚三鱣途危畏十羊不眠空畫

肚中夜感夷傷 顧雲樓詩云江樹迷天際勞勞望眼
舒稀封士行鮓長跪凱之書降志聊甘辱移忠敢自疎
何年乞休沐瓜瓏待揮鋤 學海堂詩云孤憤來瓊海
封章動永陵稜威一筆架樾蔭萬松塍縑比原難匹蕭
規識所承步趨高架在懸對玉壺冰 樹梓軒詩云三
年榎木拱七日豫章林寂歷含霜質輪困聳壑心露莖
滋滌硯風籟韻調琴恠底韓夫子庭楸百遍吟 芥舟
詩云碧篠穠桃處精廬結構成茅亭雲外亞書舫鏡中
行紙尾供批答檐牙嬾送迎生平愁觸忤誰似野舟橫
方竹山房詩云摸稜蘇相術規竅柳州文出處同聲
叟盤桓只此君碧鮮凌翠礪清閔隱簾曛誰似詹承旨

琳瑯御藻芬 梁機牧愛堂詩云真儒石刻珍傳久經
術源流服習尊山國竭來勞幾載官箴長是味三言庭
軒澹蕩花風細春氣網緼雨露繁文物一新風俗古高
懸墨妙使君恩 顧雲樓詩云移孝爲忠信所欽還同
出處假登臨看雲一縱官樓目捧日猶懸魏闕心嶺樹
煙收晴縹緲江天秋濶雁浮沉分明鄉路層層接失喜
閩門見好音 學海堂詩云名宦由來傳此地瓊山勁
節砥迴瀾後來能事人誰屬前輩心期學所難堆架竒
書盡鴻秘橫秋老筆亦霜寒歸朝袞職還當預珍重威
稜殿上看 樹梓軒詩云何人樹木寓深情高拂青霄
露掌擎文理青含太古韻良材雅著尚書名世家根本

喬柯遠公子精神玉雪清應共碧桐高百尺德輝養就
鳳雛鳴 芥舟詩云爲憐畫舫錫名嘉仍著茅亭倚竹
斜到眼無驚恣游咏此心不繫任煙霞鴟夷虛泛三更
棹牛女徒勞八月槎解識坳堂杯水意起看門外即天
涯 方竹山房詩云可對斯人只此君還隨琴鶴細含
芬霜根宛抱寒巖操天籟常敲古署雲妙品廉隅扶直
節托根幽徑斂斜曛柯亭雅有非常韻未抵鋒稜面面
分

寅賓館在儀門內廢厥舊址張尚瑗建工科給事王原記
今仍廢置爲義倉儀門外迤右有古栢一株旁有知縣
唐希臯所撰題名記碑張尚瑗又撰後題名記碑角門

贛州府志

卷十二

興國官廡

五十一

右有知縣黃泗所撰舉廢事記碑角門左三楹爲土地
祠

沈時棟儀門古栢詩云虬榦森森掛碧蘿千年留得此
喬柯乾陵剩蹟休嫌晚新甫遺詩未足多却待化龍看
夭矯每因巢鵲愛婆娑使君珍重非無意曾歷風霜未
肯磨

教諭廡在明倫堂後即尊經閣 訓導廡在明倫堂右
縣丞典史廡俱在縣治左主簿廡在縣治右後丞簿缺裁
典史移居主簿廡 國初傾圮康熙二十年辛酉典史
陳振祖新之額曰勤慎堂

迴龍寨巡檢司在寶城鄉衣錦寨巡檢司在衣錦鄉

分司公署在縣治東南隅明初知縣馮欽建中爲澄清堂
後爲公餘清燕軒康熙四年乙巳創設興國營守備遂
借居於此

府館在縣治西久廢 陰陽學醫學俱廢

僧會司在三檀寺 道會司在治平觀

會昌縣官廡

會昌縣治在城北宋太平興國七年壬午建紹興四年甲
寅軍使趙汝回增建譙樓額曰嚮明元至正中寇燬大
德元年丁酉復爲州達魯花赤別普花復建明洪武十
一年戊午災洪熙元年乙巳知縣鄭銘重建景泰五年
甲戌知縣陳顥增建廳事及吏舍六間成化十六年庚

贛州府志

卷十二

興國官廡

五十二

子知縣梁潛新之重建儀門譙樓自爲記宏治十年丁
巳知縣馬騏又新之萬歷四十三年乙卯知縣冒夢齡
設屏牆明末盡圯惟縣廡僅存

梁記畧云成化庚子冬十一月予出宰會昌蒞吏之初
環視廡宇儀門譙樓傾欹而將仆六房各缺其前之半
而臨街榜亭尤速壞焉因歎曰此前人蠹敗之極其可
坐視而使之大壞乎時有難之者曰公政令未孚於民
德澤未洽於下况邑小民艱而遽以是爲言得無難乎
予默默退而求於昕夕間越明年探諸帑得訐獄之入
鈎金二鎰責能吏者購材而新之又有難之者曰縣治
之廡宇壞者非一欲新之微百鎰金不可今以是二鎰

而剏厥功吾見其所挾者約所費者奢底於有成不亦難乎予亦漠如也遂創工於辛丑冬十月而訖工於壬寅夏四月予則總其事而典史胡冕程其工義官劉忠醫學訓術蕭庸老人徐大淵劉澄等司其出納是舉也民不橫役財不濫用費不擾民役不違時工竣耄穉羅拜庭下曰縣治之頽敝久矣公來而新之實爲一邑偉觀不有文以勒諸貞珉無以垂永遠予謂廨宇之興廢有司責也苟謂其難而不爲至於敗壞而不可支職誰之咎歟予是以不憚力爲經營以聿觀厥成未敢侈爲已績特書之以勵夫將來之有志於修廢舉墜者是爲記

國朝順治十二年乙未知縣王洵重建政事堂幕廳及庫舍自爲記康熙元年壬寅知縣王志整新之九年庚戌知縣王凝命增建贊政廳於廳事左寅賓館于譙樓東四十七年戊子知縣董霏復新之顏其堂曰勤政廨內東西各有書舍

王記畧云政事有堂所謂向明出治與萬物相見之地也一念之誠僞於堂乎徵之一事之得失於堂乎攷之一日之勤惰於堂乎驗之故登斯堂者心術不可不正刑賞不可不慎服息起居不可不嚴未可漫然以處之者也會昌自國朝定鼎之初疊經兵燹公私廬舍悉皆灰燼無存予來蒞茲土遍地蓬蒿即欲爲一邑招集殘

散寧爾幹止將於何地發徵檄布令甲耶於是集紳士屬耆老相與輸資效力鳩工庀材諏吉興事焉凡爲屋五楹虛中爲堂東西翼以庫倉前列廣庭率從簡樸不事雕飾工成羣相告曰是役也不可無一言以誌之予不敏雖無以著效於爾百姓第願登斯堂者靜思夫瘡痍未起何以恤之生養未遂何以厚之萑苻未靖何以弭之訟獄未息何以平之而且城社之奸何以剔積弛之習何以振利害興革何以措施有方也簡命煌煌敢云心術可勿正刑賞可勿慎服息起居可勿嚴乎余既得藉手以告厥成若夫化行俗美踵事增華深有望於後之君子云

教諭訓導廡俱在明倫堂後

典史廡在縣治西康熙三年甲辰典史紀統綱重建三十七年戊寅典史王大憲增建退居室

湘鄉巡檢司在縣南八十里今改爲均門嶺巡檢移駐其地

承鄉巡檢司在縣北八十里今裁廢

院司始建於明正統間兵燹基址改建學宮 國朝康熙元年壬寅知縣王志鏊就嶺北道舊址創建

府館在縣治南 陰陽醫學俱在縣治前今皆廢

僧會司在南禪寺 道會司在天真觀

安遠縣官廡

遠縣治在城北唐貞元四年戊辰創建先是建中三年壬戌刺史路應建萬壑臺於縣治內宋時又建整暇臺於尉亭西後屢經兵火

按梁大同十年析雩都東南鄉置安遠縣尋廢唐貞元四年又割舊地復置則縣廡當即此時所建然古蹟內有建中三年於治建臺豈未復設縣時先七年事耶因附入而書所疑

明洪武初知縣李玉重建規制咸脩永樂至正德知縣林性陳佑江璿甘文紹劉瑀相繼新之宣德間知縣李處仁建望昕亭胡儼記宏治二年己酉知縣甘文紹建縣廡於正堂左復葺望昕亭嘉靖九年庚寅知縣劉信

增建廳事顏曰公明內有古栢二株後堂曰忠愛三十年甲寅知縣吳卜相重葺縣廡增建川堂隆慶四年庚午知縣李多祚修儀門外東有寅賓館向爲土地祠縣治前西有掛榜亭與總舖相連共十間隆慶六年壬申知縣周泉建縣廡左有百花亭萬歷三十七年己酉知縣向楫建崇正十年丁丑知縣陳瀧奮匾曰靜觀堂胡記云大江之西章貢居上游安遠章貢屬邑僻居山溪之間編戶不滿四百賦稅之入僅足當其吏俸與師生廩餼每郡有役民以遠不占雖部使者至不過移文書期會於郡而已地犬牙閩廣瘴癘時發物產寡而行旅稀故仕於其土者雖有高才異能亦莫展其用焉且

其民伉健一或失其撫循即引去召不復至故事雖簡而治實難華亭李處仁之宰斯邑也一切破崖岸而爲之暇日坐學宮召父老率其子弟與之講說因其俗而化導之於是山溪之民聞風而嚮化田野滋闢戶口益加迺即廡宇東偏作亭以資眺望亭之前直聿山峰巒列秀每旦日出光彩先見官府視事邑人興作率以爲候名亭之義蓋以此也處仁居山溪之間徒以區區不得展布其材登斯亭也覽觀賦詠寧無高舉遠遊之思乎雖然食祿者不敢怠其事善治者不敢鄙其民隨遇而施惟適之安窮理樂天者之所爲也處仁儒者達理道既能因俗以爲政則凡燕休於此者將無入而不自得焉

國朝順治八年辛卯知縣牛天宿重修大堂十四年丁酉譙樓朽壞趙忠柟修十八年辛丑倪衷復重修縣廡康熙二十年辛酉于作霖於百花亭前建挹青館自爲記二十一年壬戌重修幕廳譙樓禁獄獄前築垣爲羈候所乾隆二年丁巳戴彬暢改百花亭曰自在軒于記畧云安署左偏有宇軒而廡仰其額曰靜觀堂邑人則羣呼爲百花亭不知始何年求其花蓋十不得一焉余詢之吏曰此亭先名百花而後易以靜觀耶抑其植花實繁雖匾靜觀而人艷其稱爲百花耶吏不能對余乃嘆曰世之名實不相副者何多也有如此亭矣余

乃今而求實之遂廣徵花且以金購騷人釋子有聞而遺者輒受之不以為貪期年而嘉卉芳草不下數十種或盂而几或閑之籬高下參差若蹲若侍亭之前三十武為方池池之上別建一館四楹重竅跂然爽豁與靜觀相望適吾兄陸阿至題之曰是宜名挹青挹青者何左挹東峯右挹西霞南挹九龍諸嶂如屏如黛而近則挹吾花竹庭暉也是館成而亭之佳勝始具洺事之暇與二三從遊坐階前大榴下嚼盃縱談睥睨肆顧爰指盆而數之余之植花雖不滿百蓋幾幾乎半之矣再期而及之未可知登斯亭也幽馥送馨疊嵐獻翠萬樹含烟千畦漾綠可坐而覽可卧而遊可緩步而騁懷可凭

檻而遠志既曰挹之言將注之注之何盡挹之又何窮哉陸阿掀髯而笑曰有是哉吾弟之為治蓋務實而非好名者也雖不敢望河陽之芳蹤亦少異乎筐篋之俗吏於是為之記 戴彬暢自在軒詩云荒亭遺址棘叢遮勝跡何緣問百花蔣徑重開新得路邵瓜學種暫為家烟籠柚蕊香飄案清吸廉泉水當茶乘興好來消遣處幾行筆墨舊生涯

教諭廡舊在文廟右改建明倫堂旁 訓導廡舊在文廟

左改建崇聖祠左

主簿廡在縣堂西

典史廡在縣堂右明宏治二年己酉知縣甘文紹同典史

祝廷璋建 國朝順治間典史薛英重修廡後及西偏
空地今作倉廩

板石巡檢司在板石堡明宣德八年癸丑設 國朝乾隆
四十二年春水漲發堂屋被傾巡檢潘贊勳支俸修葺
嶺北道行署在縣治南明宏治三年庚戌知縣甘文紹改
建今廢

府館在縣治南明成化間知縣程鷓建

醫學在縣治西報功祠右明永樂間訓科唐景澄建嘉靖
間訓科唐濟明修今防兵借寓

陰陽學附城隍廟今無

龍南縣官廡

贛州府志

卷十二

安遠官廡

五十八

龍南縣治在城東北隅南唐保大中縣令蕭經建宋紹興
中寇燬隆興中縣令段秀實重建慶元間縣令孫端懿
新之元至正二十四年甲辰災明初知縣莘持敬重建
燬於寇洪武十五年壬戌知縣盧濟重建宏治四年辛
亥知縣張文重修正德十一年丙子儀門災知縣盧鳳
重建嘉靖六年丁亥典史韓璘新之四十二年癸亥都
御史陸穩檄知縣龔有成改建如制初縣衙經龔有成
創建後廡工未竟隆慶三年己巳知縣邵元高繼葺萬
歷五年丁丑知縣王繼孝建毓秀軒於廡左歲久燬
國朝順治七年庚寅知縣賈程誼改建書室十五年戊戌
知縣高光國築齋顏曰無事康熙五年丙午知縣朱臨

構君子亭於右側九年庚戌知縣馬鎮建川堂君子亭
前有嘉樹軒二十七年戊辰知縣鄭世逢創

主簿廡在縣治右今廢

教諭訓導廡俱在崇聖祠後

典史廡在縣治左順治八年辛卯典史劉三傑增建吏舍
下歷巡檢司隸定南

察院行署在縣西燬於寇康熙五年丙午構造三楹今爲
防守所居

布政分司在縣東南按察分司在布政分司右明成化二
年丙戌知縣謝澤建今皆廢

陰陽醫學舊在倉門樓外今廢

贛州府志

卷十二

龍南官廡

五十九

僧會司即梵安院 道會司明洪武中罷

長寧縣官廡

長寧縣治在大街北南向明萬歷三年乙亥都御史江
一麟檄知府葉夢熊沈文淵建今稱老縣堂後知縣徐
克遷建玉屏山下東向規制皆備

國朝康熙五年丙午堂圯七年戊申知縣井廡重修歲久
復圯四十三年甲申知縣朱騰蛟重修五十七年戊戌
知縣邵錦江建環山堂於縣治後又遷治左尉廡於預
備倉舊地改廡爲寢室即今新署

教諭訓導廡俱在明倫堂後

典史廡舊在縣治堂左典史鄭之鵬新之知縣井廡顏其

廳曰致瑤堂後有鳳尾焦一本大合數抱枝榦盤鬱花
開如鳳形康熙末邵錦江撤預備倉舊址別建新廡顏
其堂曰皆春左爲息軒後爲內省堂 國朝雍正十一
年癸丑黃鄉新坪兩司合創公館於廡左
黃鄉巡檢司在縣西八十里明嘉靖二十三年甲辰建乾
隆三十年裁
新坪巡檢司未建縣時在大墩堡順治十六年己亥巡檢
徐良弼奉檄遷於雙橋丹竹樓絲茅坪築土城今爲文
昌祠後復遷雁洋坪距縣六十里
分司在阜城門內歲久圯雍正元年癸卯知縣蔡賓興改
爲義學十年壬子知縣陶士正改爲

贛州府志

卷十二

長寧官廡

六十

上諭亭

府館舊在春旭門內今改建楊公祠並育嬰堂
公館在三標堡知縣井廡額其堂曰謀野寢室
陰陽學 僧會道會二司俱無考

定南官廡

定南廳治在南門內本高砂堡蓮塘鎮明隆慶三年己巳
都御史殷從檢檄知府黃宸知縣陳瀾創建後爲縣廡
左爲來薰亭萬歷五年丁丑知縣鄒兆陽建堂曰近民
後堂曰敬簡萬歷九年辛巳知縣劉世懋鑄銅鐘於譙
樓十一年癸未知縣章瑩更新之規制皆備

國朝順治六年己丑廣寇襲縣止存大堂餘悉燬十四年

丁酉知縣祝天壽修復乾隆二十八年癸未知縣黃恂
捐修大堂內廡三十九年甲午同知黃汝源借廉修理
儀門譙樓

訓導廡在明倫堂左

照磨廡即典史廡在廳治右舊由頭門出入乾隆三十八
年癸巳照磨姚益傅捐修別建頭門四十一年丙申照
磨王士嚮借廉修理內廡

下歷巡檢司在鎮守公館右舊屬龍南明洪武元年戊申
建成化末巡撫都御史李昂議設弓兵防守隆慶三年
己巳建今縣割而屬之舊址在城外大路邊嘉靖四十
五年丙寅寇平後創置鎮守公館移建城內

贛州府志

卷十二

定南官廡

六十一

嶺北分司在縣治西北明萬歷五年丁丑知縣鄒兆陽申
詳創建順治間知縣祝天壽修康熙八年己酉知縣程
正緒重修十五年丙辰寇燬

府館在縣治東明隆慶三年己巳知府黃宸建

陰陽學在旌善亭後 醫學在縣治左俱隆慶三年建

雜建置

府慈幼院在城外朝天坊宋知軍鄒應龍建收養貧家生
子不舉者括諸邑逋逃租贍之

居養院在慈幼院南宋時建收養無告之人及病患者歲
支常平米一千四百八斛八斗

福地院亦宋時建歲支常平米三百七十八斛九斗

廣會館在水西臨江寺側宋知軍陳升憲鍾時建踵趙清
獻扞護送出嶺孤嫠遺制籍廢寺田以資之共出納屬
左司理以上俱廢

老育嬰堂在縣治東縣岡坡下 國朝順治三年丙戌副
都御史周清原奏請建立擇空間祠宇建設官率士民
捐輸爲日給費五年戊子因廢祠爲之今已就傾
新育嬰堂在府前東街乾隆四十年乙未知府吳山鳳倡
率贛縣紳士曹鎮陽高侯吳之炎等捐置民房改造存
捐銀二千八百兩有奇交商生息爲養膳之資

普濟堂在城東府倉前即關部衙署舊基乾隆三十五年
庚寅奉文建造收養各屬老民五十五名日給米薪油

贛州府志

卷十二

雜建置

六十二

鹽菜蔬冬給棉衣褲被經歷司管理經費赴司領發
贛縣養濟院舊在忠惠坊明宏治間知縣何文縉改建於
東郊天竺山後徙城內廉泉亭左崇正間知縣陳履忠
移於城東角東勝山後

雩都縣養濟院在西郊外明洪武初知縣宋宏建萬歷二
十一年癸巳災知縣黃應元重建崇正末燬 國朝康
熙三十二年癸酉知縣趙愷改於東城外四十二年癸
未知縣盧振先移北郊邑厲壇

育嬰堂在縣治東

信豐縣養濟院在寶塔寺左明正德間遷禾豐門外左隅
嘉靖十五年丙申知縣徐鑾修

育嬰堂在清平門外老官廟左

惠民藥局在縣治西明洪武間知縣趙仕宏建今廢

興國縣養濟院在南門外明知縣賈思復建正德十三年

戊寅知縣黃泗徙迎恩坊東今在李屋塘風雨壇左

育嬰堂在縣治東雍正七年己酉知縣白成李建

會昌縣養濟院在富尾下市明洪武二年己酉知縣周文

秀建後圯國朝康熙十一年壬子知縣王凝命捐築

小舍

安遠縣普濟堂一在教場名將祠背一在教場東邊乾隆

元年丙辰知縣戴彬暢奉檄率合邑紳士唐栻等建七

年壬戌知縣吳昉添建寢室厨房并置瞻租有記

贛州府志

卷十二

雜建置

六十三

養濟院在西門外塔下明洪武初知縣李玉建嘉靖三十

年辛亥知縣吳卜相改建新教場後知縣李多祚重修

國朝順治間知縣倪衷復重修

龍南縣養濟院在縣西明洪武元年戊申建嘉靖間知縣

施廷美遷於教場左隆慶五年辛未知縣文程改建坊

內保金鈎里邑人王世仁贍

長寧縣養濟院在阜城門外邑厲壇前

定南廳養濟院舊在城北背山明知縣章瑩改建教場右

育嬰堂在城隍廟側

惠民藥局在醫學左

論曰南部都尉之設南康國之建由雩而贛乃定爲

郡官廨亦遞相沿革年遠不可攷唐末防禦使之所治沿宋至明猶得指鬱孤臺麓舊址想見良二千石典郡之風流焉明自中葉開府建牙實□茲郡睽四省之封疆資嶺北之保障我

國初尚仍其制蓋時至事起不必相沿襲事勢有不得已者迄於底定之後贛院撤而四道併政歸簡易廨舍多所更易是以道遷於院府遷於道考院遷於府舊治他如郡佐縣貳以及各屬邑或裁或改不常厥居者類然矣今自院道府縣官廨之可攷者上下千餘年興創修葺移置改革之由叅訛訂異而備書於冊夫居是官則任是職大臣不可以不法小臣不可以不廉燕間休沐之餘皆兢業惕厲之顧可晏然托處於公廨歟至若文武相經緯兵民相維繫贛以上游大鎮統轄六郡總戎帥府之所屬營廨鱗次規制崇閎別詳軍政志中從所重也攷志乘者不可合觀而得其體例也哉